

## Arabako Mintza Eguna urriaren 20an, Murgian

ZUIAKO KUADRILLAN, Murgian, ospatuko du aurten Topaguneak Arabako Mintza Eguna. Euskara ikas-teko mintzapraktika egitasmoetan parte hartzen duten arabarrei, baita aritzen ez direnei ere, gonbita luzatu zaie datorren larunbata jai giroan pasatzeko. Goizean ibilbide gidatua egingo dute Zuiako eta Euskal Herriko mitologia ezagutzeko, eta ondoren, mintza probak izango dira, alegia, berba-pasak, esaera zaharrak eta palindromoak osatu beharko dituzte. Bazkalordura gosez iristeko kantu jira egingo dute. Sabela betetakoan etorriko dira bertso-antzerki-kantu saioak, dantzaldia eta kontzertua. ■



## ‘Zazpi ebidentzia birjaiotzarako’

HALA DU IZENBURUA Xabier Amuriza bertsolari eta idazlearen azken liburuak. *Euskara batuen bigarren jaiotza* liburuari segida eman nahi izan dio; gai txiki eta eztabaidatsuk alde batera utzi eta arazo nagusiei heldu nahi izan die. Arazo nagusi horiei ‘ebidentzia’ deitu die, eta egileak dioenez, ebidentziaren aurrean bi aukera baino ez daude: onartzea ala ukatzea. Erdi bideko eztabaidek ez omen dute askorik balio. ■



Erdian Xabier Amuriza ‘Zazpi ebidentzia birjaiotzarako’ aurkezten.

## Bahea

Joxe Manuel Odriozolak *Berrian* esanak:

“Urkulluk euskararen inposizioan sinesten ez baldin badu, *de facto* espainieraren inposizioan sinesten duela ondorioztatu beharko genuke, beraz. Ez baitago beste aukerarik. Markel Olanok ezin baldin badio kazetari erdaldunari euskaraz hitz egin, inposizioa delako, *de facto* espainieraren inposizioa onartzen ari zaigu Urkullu. (...) Nazio konkistatu eta kolonizatuetakoa agintari batek historian atzera begiratu gabe gobernatzeko duenean, horrelako jarrerak nagusitzen dira: berezko herri-hizkuntzan bizi nahi izatea inposiziotzat jotzen da eta, aldiz, nazio zapaltzaileen hizkuntza zapaltzailean bizitzea legitimatu egiten da bizikidetzaren eta demokraziaren izenean. Jarrera hori errealismoaren eta zentzu komunaren izenean zurrizten du agintari alienatuak”.

## EKONOMIAREN TALAIAN • TERMOMETROA

### Tobin ez da Botín

TOBIN TASA berriz ere egunkarietan. Gobernuak, Tobin tasa edo Finantza Transakzioen Tasa (FTT) ezarriko dutela eta krisia arintzeko erabiliko dutela sinetsarazi nahi digute. Nazioarteko goi-bileretan aspalditik ari dira zerga horretaz hitz egiten, baina beti atzeratzen da ezarpena. Hala ere, kontuan eduki behar da James Tobin, 1971n Bakearen Nobel sariduna eta zergaren sustatzailea, ez dela Emilio Botín, ezta Francisco González ere, Banco Santander eta BBVA-ko presidentek, hurrenez hurren. Tobinek kapital fluxua kargatu nahi zuen, prozesua mantsotzeko, gutxiago espekulatzeko, eta trukerako neurriek hainbesteko fluktuazioerik ez izateko. Orain proposatzen den zergak transakzio gordinak kargatu nahi ditu, edozein konpentsazioen aurretik, eta finantza transakzioetan jartzen du arreta. Proposatutako zerga-neurriak %0,1 dira akzio eta bonuentzat, eta

%0,01ekoak produktu eratorrientzat. Europar Batasunak, aldiz, aukera justuena eta sozialena alboratu du: Finantza Aktibitateen Tasa (FAT). Zerga honek finantza sektorearen balio erantsia kargatzea du helburu –etekinak eta soldatak gehitzean lortzen den kopurua, bankuetako zuzendariei eta funtsen kudeatzaileei ematen zaizkien bonuak barne–.

Beldurra zabaltzen ari da, lasai asko gerta baitaiteke zergaren karga fiskalak bezeroei eragitea, zeharka bada ere, komisioen bidez, esaterako. Zeinek kontrolatzen du hori? Sharo Bowles eragin handiko europarlamentariak esan du FTTak, bozkaturia izan den gisan, antza gehiago duela Nottinghameko sheriffarekin Robin Hoodekin baino. Gehiago bilduko dela segurua da, baina sinetsarazi nahi izatea bankuek eta espekulatuzaileek kostu hori bere egingo dutela, engainatzea da. Botín eta González ez dira Tobin. Bistan da. ■

Juan Mari Arregi

